

三怡堂叢書

師竹堂集

四八

三怡堂叢書

解竹書

卷八

師竹堂集卷之二十七

三怡堂叢書

汝南王祖嫡胤昌著

祭文

祭郭相公太夫人

瞻彼鄴下中土名封洄流融衍坤淑攸鍾於曜禕靈壺範
允懋彤管嗣徽璇閨挺秀齊德夫子賁于丘園雀臺之墟
人擬鹿門維嶽降祥元臣天錫塤彼埋鬻禮容是廸蚤翔
玉署晉簡黃扉下賢吐哺翊聖垂衣帝曰休哉惟予碩輔
出緒遡源令儀有姆八旬鶴算一品龍章郡詔勝蹟畫錦
開堂老勤機杼貴厭穀綺秉禮愼微敬姜並美鯢齒云遐

胡弗百齡瑤萱萎茂寶婺輶災受茲介福恩卹加渥賜酌
授兆永輝宰木某等獲交喆嗣叨步後塵欽懿良切聞訃
共辛酌彼寒泉爰擷芳芷遙睇漳濱逝波無已

祭諸封一品夫人張母陶氏

嗚呼今之闡揚內範者率侈其遇不知遇信難矣而偶值
亦多略女貞而詳介福非遡源正始之意矣維靈毓秀名
門儷德喆士相夫佐郡清白流聲撫育遺孤無殊已出中
饋允宜前徽克嗣賢母之譽冠於燕趙司馬公起家庭對
振直諫垣擁旄北門控制左輔經略安壤勲在社稷追國
計告匱則畀主畫籌戎務弗飭則畀握樞筦當是時太夫

人已病信使相繼所以諭司馬公者無非致身報主之誼
司馬公鞠躬盡瘁不敢言私則以慈誨故也太夫人病甚
司馬公休致之疏十數上乃溫留愈篤至于請惡情切特
嘉公孝給傳歸省未幾而太夫人仙去含殮獲親人稱司
馬公純孝所感不知莫非君恩也嗚呼太夫人始終以忠
孝誨司馬公司馬公始終以忠孝副太夫人之訓此眎徒
侈其遇者何如哉八旬上壽一品崇階恩卹隆渥哀榮備
極則中外豔美人人知之固可略也某爲諸生司馬公分
臬中州已辱知遇兒子延世持檄遼鎮出入鋒鏑樹有微
勞司馬公嚴覈而請叙焉此世世大惠也司馬公諸孫金

吾君與延世習騎射講孫吳矢表見于疆場以是諗悉太夫人懿行而某奉使歸里遭先慈之變病卧荒廬不能遠出謹遣家僮抒悃太夫人之靈而重之以詞且俾爲臣子者懋忠孝大義是太夫人暨司馬公意也

祭誥封太淑人董母老夫人

嗚呼古稱賢母非謂相夫教子有功于國家耶然而時異勢殊恒難相值是故辛苦拮据而能享子之養十之六七享子祿養十之四五享祿養而崇膺榮封十之一二崇膺榮封而康強壽考百之一二康強壽考而至期頤又見諸孫之有成也雖謂千萬一二可也太淑人實備矣雖然此

但以遭際之盛言爾司空公填撫隴右茂著安攘特簡邦
士旦夕膺樞筦重寄乃念母終養毅然靡奪所謂不以三
公易一日乃今見之出爲忠臣入爲孝子使悠悠仕進甘
心絕裾者媿死不暇又寧直尋常庭闈娛侍已哉某讀中
秘書時曾爲文壽母條忽十九年今復操文以奠不能不
愴惻然而介福完祉焜耀一時恩卹隆渥嵩若增高洛若
增長矧司空他日簡用所以奉懿訓而揚芳徽者又不止
此雖謂古今一二亦可也太淑人賢母九原有知當不以
區區之言爲諛墓流也

祭誥封淑人外大母丁氏暨孝廉述山舅氏

嗚呼古稱有是父必有是子而不及慈範豈以中饋之職而泯梱外之譽耶然發祥流慶多本內則姪姒母論已斷機和丸之類又何以稱焉我外大父雷山以武烈顯我外大母實左右之篤生舅氏以文行冠申士已薦竟拘于數監司之檄同儕至今惜之豈非命哉而孝養備至能以母之貞操表諸閭可謂克子矣母卒于前子亦逐于地下雖人間極可悲者宇宙間疇不死茲生能養死能隨又何必慕露電泡影之歲月哉某兄弟幼與舅氏同筆硯同塲屋外大母撫之誨之不殊諸孫今稍成立而外大母不可見矣予母太恭人亦棄某兄弟逾期矣泉壤信有知其

聚而叙幽明之感悲耶喜耶當不異人世矣震之麓郡稱
佳城表弟茂亨擬舉雙舉卜吉寔焉其佑茂亨福壽多男
當不俟區區之祝願也敬奠一觴抒此衷慄嗚呼痛哉

祭誥封劉母唐氏老夫人

嗚呼悲哉予尙忍操文告夫人耶夫人與子母同庚蓋自
丁丑春分校禮闈得令嗣禮卿沈毅粹雅固知爲大受詢
及家世知慈誨爲多云夫人生自名族女誠蚤閑追歸翁
仕雖不顯而佐邑著良績儆戒相成不可誣已篤生諸子
並稱雋彥乃禮卿成進士贊大司農裕國計鳳冠象服用
揚內則可謂榮矣而禮卿督儲于外每念夫人輒欲棄官

去壬午秋予以思母奉使豫章便過京口拜夫人闔外夫人命諸子治具金焦北固爾時甚健也予歸十月老母背棄又一年夫人亦厭世長往悲乎哉禮卿純孝茲必毀脊予不能強顏爲節哀之慰第以禮卿有重望嚮用方殷贈卹渥典源源未艾也而予病卧荒塋念灰神槁溘盡有期顯揚無覲子母雖與夫人同庚又安得與夫人同福哉因夫人而痛吾母不啻初喪千里陳詞亦以抒吾哀慄耳精爽不昧倘地下與子母相見其不慰且勵乎情至之語惟夫人鑒之

祭誥封夫人何母高氏

嗚呼余聞之父老云申多名喆若大復先生海內宗仰非
州人所得私又若鐵溪先生抗直郎署著績鉅郡備史氏
之三長擅鄭虔之二絕咸位弗稱才年弗滿德真宰疑憎
憎矣蓋自大復先生沒後魏科撫仕奕葉重光說者謂信
陽一出靈寶四明遂絀其盛高氏門祚稍微而清淑之氣
鍾厥孫息如夫人者蚤育閨梱已負貴徵迨歸震川公孝
慈貞順軼美往媛中饋恒瑣姑略勿述而斷機厲志于樂
妻舉盥式恭于鴻婦震川公奮起詞垣簡登綸閣固述祖
德寧泯內助耶夫人舉文夫子二有出藍之譽又季少非
已出而愛逾二子余嘗謂婦人百行可勉惟妬不可勉夫

人此心鬼神爲泣矣夫功宜食報德宜永齡迺以末疾遽爾長逝余悲且歎益疑真宰之懵懵徐乃知夫人之生特畀天中旣光厥宗又熾夫宗意者造物閔夔府之未竟故鍾女德以報鐵溪耶余妻以娣事夫人常締兒女之好故微懿獨諗茲者靈輦返乎義陽祖奠一觴遙遙素髮悽怛用傷若夫贈卹之隆渥子孫之顯揚玄扃流耀彤管載芳則世共豔美奚俟鄙言始彰哉

祭誥封太恭人師母方氏

越以才甲海內而婺又稱雄毋論科第卽忠孝節義之士接踵又多賢婦貞女地耶人耶時所感耶予師澱陽先生

蚤慕古人思得婦如德耀者里中富室競欲得先生先生不屑也乃夫人蘭芳玉潤志侍君子不欲苟然而已卒歸先生斯非天哉夫人之歸先生也事上孝恤下慈待閭里惠而儆戒左右先生者尤至先生及第官詞垣夫人不爲喜出嶺徼謫河東夫人不爲愠賜環柄用所以儆戒左右者猶夫布衣也可不謂始終內外一以德義相成者哉先生甫佐南雍夫人遽逝千里將信勗先生以報上恩毋內顧斯其懷曠其識卓尤非聶孺兒女子所敢望寧獨兩浙之淑已哉夫人旣以先生貴贈卹隆渥方來未艾且篤生諸子聳壑昂霄和丸晝荻之訓益彰也介福完祉復何遺

憾乎

某

以使事泊舟潑水謁先生靈洞山房拜夫人堂下

歸僅十月先慈背棄夫人亦以其時仙去也夫人寄先慈
衣幌諸物言及摧裂誠不忍視信有鬼神當復泉臺一痛
或結瑤池之侶乎辦香攄悽愴劣荒迷無庸韻語亦不知
作何語惟靈鑒之而已

祭勅贈孺人馬老夫人楊氏

靈輦就佳城其子賓友人

某

先四旬餘有祖母之變哀毀

不能往送乃具牲醴匍匐以奠之曰於惟夫人女誠克備
更僕未陳也予所感于夫人者其難有六云我百愚翁之
謫戍賓陽也禁網方熾交游屏息噤不敢一語夫人以閨

閨弱質委身中饋藻識賢哲匪伊所思其難一也實號

鄉侵觸易斃愚翁清癯若不勝衣夫人人事之飲食與居罔

不中度儉游徜徉至和弗戕其難二也愚翁晚歲無子投

荒遐域乃生用光雖天佑忠鯁俾昌厥後而鍾毓秀傑實

自夫人其難三也愚翁直並朱雲幾遭牽去名同唐介竟

未生還旅櫬幼兒遙遙萬里夫人乃棄墳墓辭父母間關

千狀至我申疆其難四也夫人至申力謀襄事囊有敝書

家無石儲矢心冰蘖可泣鬼神厲志勤儉不間內外其難

五也用光尙幼且多疾病夫人周旋保護備歷辛苦涕泣

勉諭逮就外傳折節向學長老嘉歎謂有父風其難六也

嗚呼古垂四德之懿未聞六難之萃愚翁清爽如雷在天
如水在地卽相見何恨哉光耀迅奔流波難轉彭殤修短
泡影奚言節義何物獨與兩間不朽夫人其亦自慰乎某
誼辱通家詞多憤俗一觴再拜悲愴曷勝昭以表愚翁之
孤忠發夫人之潛德抑于用光兄弟少勗草木之哀奮顯
揚之孝也哉

祭誥封太恭人陸母

某等義陽鄙人也往歲負笈都門待試宗伯海內雋彥聚
首晤語兩浙人士彬彬甲他省縱談今昔間及姆儀乃知
太夫人之賢不可及也是故慧擬大家敬擬德耀孝擬龐

姬教擬軻親諄擬滂母老能勤貴能儉也擬諸敬姜至其
敦比鄰之誼紆箋子之句振戾散積惠敷遐邇懿德粹精
內則無漏所謂閨闈之良範賢豪之仰成非耶每聆斯述
恨不捧觴稱壽親覲儀刑逮迺孫愼菴公蒞吾申也循良
之政廉敏之行博洽之識益民無方邇流于源考茂于本
雖木捧觴稱壽視曩者徒聆厥述不有問乎太夫人怡神
葆和迎養弗就純祐遐齡將謂曆所不能窮序所不能究
某等或他日通籍仕途奔走越土登堂稱壽一慰素悰私
愿方殷訃聞忽至長天萬里瞻望涕零豈貞淑靡常造物
特厚若古賢聖一見亦靳耶遙拜敝詞山川修闊精爽罔